

# 菩薩摩訶薩欲住八十空當學般若

「大智度論」集粹之三十

## 般若波羅蜜

智  
銘

(續上期)

欲令衆生知久遠已來；往來生死爲大苦，生厭患心。如經說：一人在世間，計一切中受身被害時，聚集諸血，多於海水。啼泣出淚及飲母乳，皆亦如是。積集身骨，過於毗浮羅山，譬喻斬天下草木爲二寸籌，數其父、祖、曾祖，猶不能盡。如是等無量劫中，受生死苦惱，初始不可得故，心生怖畏，斷諸結使。如無常雖爲邊，而佛以是無常而度衆生；無始亦如是，雖爲是邊，亦以是無始而度衆生。爲度衆生，令生厭心，故說有無始，非爲實有無始。所以者何？實有無始，不應說無始空。

佛以方便力故，說是無始，以無著心說，故受者亦得無著，無著故則生厭離，以慧眼見衆生及法畢竟空，以是故說無始空。如般若波羅蜜中說：常觀不實，無常觀亦不實；苦觀不實；樂觀亦不實；而佛說常、樂爲倒，無常、苦爲諦。以衆生多著常、樂，不著無常、苦，是故以無常苦諦，破是常、樂倒。以是故，說無常、苦爲諦；若衆生著無常、苦者，說無常、苦亦空。有始、無始亦如是。無始能破著始倒，若著無始，復以無始爲空，是名無始空。

十、散空者：散名別離相，如諸法和合故有；五象和合因緣，故名爲人，若別離五象，人不可得。人爲四大和合因緣生出可見色，亦是假名，若離散四大，則無有色。是色以香、味、觸及四大和合，故有色可見，除諸香、味、觸等更無別色。以智分別，各各離散，色不可得。若色實有，捨此諸法，應別有色而更無別。是故經言：所有色皆從四大和合有；和合有故，皆是假名，假名故可散。

四陰亦是假名，生、老、住、無常觀故，散而爲空。所以者何？生時異，老時異，住時異，無常時異故。三世中觀是四象，皆亦散滅。心隨所緣，緣滅則滅，緣破則破。此四象不定，隨緣生故，因眼緣色生眼識，若離所緣，識不可得。餘情識亦如是。如經中說：佛告羅陀：此色象破壞散滅，令無所有，餘象亦如是，是名散空。凡夫人未離欲故，於諸法中生愛著心，若得離欲，

見諸法皆散壞棄捨，是名散空。復次，諸法集合故，各有名字，凡夫人隨逐名字，生顛倒染著；佛爲說法，當觀其實，莫逐名字，有無皆空。如迦旃延經說：觀集諦則無無見。觀滅諦則無有見，如是種種因緣，是名散空。

十一、性空者：諸法性常空，假來相續故，似若不空。諸法象緣和合故有，象緣若少若無，則無有性。如經說：眼空、無我、無我所。何以故？性自爾！耳、鼻、舌、身、意，色乃至法等，亦復如是。性空有二種：一者、於十二入中無我、無我所；二者、十二入相自空。無我、無我所，是聲聞論中說。摩訶衍法說：十二入我、我所無故空，十二入性無故空。復次，若無我、無我所，自然得法空。以人著我及我所故，佛但說無我、無我所；如是應當知一切法空。若我、我所法尚不著，何況餘法？以是故，象生空、法空、終歸一義，是名性空。性名自有，不待因緣，若待因緣，則是作法，不名爲性。諸法中皆無性，何以故？一切有爲法，皆從因緣生，因緣生則是作法；若不從因緣和合，則是無法；如是一切諸法性不可得故，名爲性空。

畢竟空與性空有異。畢竟空者，名爲無有遺餘；性空者，名爲本來常爾。畢竟空如虛空，常不生不滅，不垢不淨，故爾不同。復次，諸法畢竟空，何以故？性不可得故。諸法性空，何以故？畢竟空故。復次，性空，多是菩薩所行；畢竟空，多是諸佛所行。何以故？性空中，但有因緣和合，無有實性；畢竟空，三世清淨；有如是等差別。

一切諸法性有二種：一、總性；二者、別性。總性者，無常、苦、空、無我，無生無滅，無來無去，無入無出等。別性者，如火熱性，水濕性，心爲識性。如人喜作惡，故名爲惡性，好集善事，故名爲善性。如十力經中說：佛知世間種種性，如是諸性皆空，是名性空。何以故？若無常性是實，應失業果報。所以者何？生滅過去不住故，六情亦不受塵，亦無積習因緣，若無積習則無誦經、坐禪等；以是故，知無常性不可得。無常當不可得，何況常相？

若性不可得，若實有是苦，則不應生染著心。若人厭畏苦痛，於諸樂中亦應厭畏；佛亦不應說三受：苦、樂、不苦不樂；亦不應苦中生瞋，樂中生愛，不苦不樂中生癡。若一相者，樂中應生瞋，苦中應生愛，但是事不然，如是等苦性，尚不可得，何況樂性虛妄而可得。空相亦不可得。所以者何？若有空相，則無罪福，無罪福故，亦無今世後世。諸法相待有，所以者何？若有空應當有實，若有實應當有空，空性尚無，何況有實？若無我者；則無縛無解，亦無從今世至後世受罪福，亦無業因緣果報；如是等因緣，知無我性尚不可得，何況我性？無生無滅性亦不實，何以故？若實則墮常見，若一切法常，則無罪無福；若有者常有，無者常無，若無者不生，有者不失。如不生不滅性不可得，何況生滅性，無來無去，無入無出等，諸總性亦如是。

諸法別性，是亦不然，何以故？如火能燒，造色能照，二法和合，故名爲火。若離是二法有火者，應別有用而實無別用；以是故，知火是假名，亦無有實。若實無火法，云何言熱是火性？熱性從象緣生，內有身報，外有色觸，和合生身識，覺知有熱，若未和合時，則無熱性，以是故，知熱非火性。餘性亦如是。

是總性、別性無故，名爲性空。復次，性空者，從本已來空。如世間人，謂虛妄不久者是空，謂須彌、金剛等物及聖人所知，以爲真實不空。欲斷此疑故，佛說是雖堅固相續久住，皆亦性空。聖人智慧，雖度衆生，破諸煩惱，性不可得故，是亦爲空。又人謂五衆、十二入、十八界皆空，但如、法性、實際，是其實性。佛欲斷此疑故，佛欲斷此疑故，但分別說五衆，如、法性、實際，皆亦是空，是名性空。復次，有爲性三相：生、住、滅；無爲性亦三相：不生、不住、不滅。有爲性尚空，何況有爲法？無爲性尚空，何況無爲法？以是種種因緣，性不可得，名爲性空。

十二、自相空者：一切法有二種：總相、別相。是二相空，故名相空。總相者，如無常等，別相者，諸法皆無常，而如有別相；如地有堅相，火爲熱相。

性與相，有言：實無有異，名有差別，說性則爲說相，說相則爲說性；譬如說火性即是熱相，說熱相即是火性。有言：性相小有差別，性言其體，相言可識。如釋子受持禁戒是其性，剃髮、割截染衣，是其相。梵志自受其法，是其性；頂有周羅，執三歧杖，是其相。相不定從身出，性則言其實。如見黃色爲金相而內是銅，火燒石磨，知非金性。如人恭敬供養時，似是善人，是爲相，罵詈毀辱，憤然瞋恚，是其性。性相、內外、遠近、初後，有如是差別。

諸相皆空，名爲相空。如說一切有爲法，皆是無常相。所以者何？生滅不住故，先無今有，已有還無故，屬諸因緣故，虛誑不真故，無常因緣生故，象合因緣起故。如是等因緣，故一切有爲法是無常相。能生身心惱故，名爲苦，身之威儀無不苦故，苦聖諦故，聖人捨不受故，無時不惱故，無常故，如是等因緣，名爲苦相。離我所故空，因緣和合生故空，無常、苦、空，無我故名爲空，始終不可得故空，誑心故名爲空，賢聖一切法不著故名爲空，以無相、無作解脫門故名爲空，諸法實相無量無數故名爲空，斷一切語言道故名爲空，滅一切心行故名爲空，諸佛、辟支佛、阿羅漢入而不出故名爲空。如是等因緣故，是名爲空。

無常、苦、空故無我，不自在故無我，無主故名無我；諸法無不從因緣生，從因緣生故無我，無相無作故無我，假名字故無我，身見顛倒故無我，斷我必得道故無我。以是種種，名爲無我。如是等名總相。

別相者，地堅相、火熱相、水濕相、風動相；眼識依處名眼相，耳、鼻、舌、身亦如是；識覺相，智慧相，慧智相，捨爲施相，不悔不惱爲持戒相，心不變異爲忍相，發勤爲精進相，攝心爲禪相，無所著爲智慧相，能成事爲方便相，識、作、生、滅爲世間相，無識爲涅槃相。如是等諸法各有別相，知是諸相皆空，是名自空相。餘義如性空中說，性相義同故。

衆生和合，故一法生，是一法空，如是等一一法皆空。今和合因緣法，展轉皆亦空，一切法各各自相空，以是故名爲自相空。

。衆生顛倒故，以一相、異相、總相、別相等，而著諸法，爲斷是故，而有所說。如是等因緣，名爲自相空。

十三、一切（諸）法空者：一切法名五衆、十二入、十八界等，是諸法皆入種種門。所謂一切法有相、知相、識相、緣相、增上相，因相、果相，總相、別相，依相。一切法有好有醜，有內有外；一切法由心生，故名爲有。無法不名爲法，但以遮有故，名字爲無法；若實有無法，則名爲有；是故說一切法有相。知相者，苦法智、苦比智能知苦諦，集法智、集比智能知集諦，滅法智、滅比智能知滅諦，道法智、道比智能知道諦。及世俗善智，能知苦，能知集，能知滅，能知道；亦能知虛空，非智緣滅，是名一切法知相。

識相者，眼識能知色，耳識能知聲，鼻識能知香，舌識能知味，身識能知觸，意識能知法。能知眼、能知色、能知眼識；能知耳、能知聲、能知耳識；能知鼻、能知香、能知鼻識；……乃至能知意識，是名識相。

緣相者，眼識及眼識相應諸法能緣色，……乃至意識及意識相應諸法能緣法。能緣眼、能緣色、能緣眼識；……乃至能緣意識、能緣法、能緣意識；是名緣相。

增上相者，一切有爲法，各各增上，無爲法亦於有爲法有增上相。

因果相者，一切法各各爲因，各各爲果，是名因果相。

總相、別相者，一切法中，各各爲總相、別相。如馬是總相，白是別相；如人是總相，若失一耳者則是別相。如是各各展轉，皆有總相、別相，是爲總相、別相。

依相者，諸法各共相依止，如草木山河，依止於地，是一切各各相依，是名依止相。如是等一法門相，攝一切法。

一切法皆空，而有種種名字，是凡夫人於空法中，無明顛倒取相，故生愛等諸煩惱，因煩惱故起種種業，起種種業故入種種道，入種種道故受種種身，受種種身故受種種苦樂。聖人清淨智慧力故，分別一切法本末皆空；欲度衆生故說其著處，所謂五衆

、十二入、十八界等；象生但以無明故，而生五象等自作自著，若聖人但說空者，不能得道，以無所因、無所厭故。

相不定故不應是相，如酥、蜜、膠、臘等，皆是地相，與火合故，自捨其相，轉成濕相，金、銀、銅、鐵與火合故，亦自捨其相，變爲水相；如水得寒成冰，轉爲地相；如人醉睡，入無心定，冰凍中魚，皆無心識，捨其心相，無所覺知；如慧爲知相，入諸法實相，則無所覺知，自捨知相。是故，諸法無有定相。若謂有爲法，定有三相：生、住、滅；無爲法亦有三相：不生、不住、不滅。若以未來世中，非智緣滅法，是有爲法而無有爲相。若謂以非智緣盡是滅相，是亦不然，所以者何？無常盡，是名滅相，非以非智緣滅故名爲滅相。如是等種種，無有定相。

聖智亦無定相，爲破凡夫所知，故名爲聖智，若無凡夫法，則無聖法，如無病則無藥。是故經言：離凡夫法即無聖法，凡夫法性即是聖法。復次，聖人於諸法不取相亦不著，是故聖法爲真實；凡夫法於諸法取相亦著，故以凡夫人法爲虛妄，聖人雖用而不取相，不取相故則無定相。

我，是一切諸煩惱根本，先著五象爲我，然後著外物爲我所；我所縛故而生貪恚，貪恚因緣故起諸業。如佛說無作者，則破一切法中我；若說眼無所從來，滅亦無所去，則說眼無常，若無常即是苦，苦即是我、我所。我、我所無故，於一切法中心無所著，心無所著故，則不生結使，不生結使，何用說空？以是故，三藏中，多說無常、苦、空、無我，不多說一切法空。若無我亦無我所，是即入空義，亦即一切法皆空。波羅延經利象經中說：智者於一切法不受不着，若受着法則生戲論，若無所依止則無所論。諸得道聖人於諸法無取無捨，若無取捨，能離一切諸見。如是等三藏中處處說法空，是名一切法空。

十四、不可得空者：有言：於象、界、入中、我法、常法不可得，故名爲不可得空。有言：諸因緣中求法不可得，如五指中拳不可得，故名不可得空。有言：一切法及因緣，畢竟不可得，故名爲不可得空。諸法實無，故不可得，若人聞上諸空，都無所

有，而心懷怖畏生疑，今說所以空因緣，以求索不可得故，爲說不可得空。斷是疑怖故，佛說不可得空。所以者何？佛言：我從初發心乃至成佛，及十方佛，於諸法中求實不可得，是名不可得空。一切法乃至無餘涅槃不可得故，名爲不可得空。行者得是不可得空，不得三毒、四流、四縛、五蓋、六愛、七使、八邪、九結、十惡，諸弊惡垢縛等都不可得故，名爲不可得空。

行是不可得空，能得戒、定、慧，得四沙門果、五根、五無學象，六捨法、七覺分、八聖道分、九次第定、十無學法，得如是等，是聲聞法。若得般若波羅蜜，則具足六波羅蜜，及十地諸功德。是法等雖得，皆趣不可得空，無受着故，是名不可得；爲無爲法故，名不可得，聖諦故名不可得；第一義諦故名不可得。聖人雖得諸功德，入無餘涅槃故，不以爲得；凡夫人以爲大得，聖人雖有所得而不以爲得，是名爲不可得空。

十五、無法空、有法空、無法有法空者：無法空者：有言：無法、名法已滅，是滅無故，名無法空。有法空者：諸法因緣和合生，故有法，有法無故，名有法空。無法有法空者，取無法、有法相不可得，是爲無法、有法空。復次，觀無法有法空，故名無法有法空。行者觀諸法：生、滅，若有門、若無門，生門生喜，滅門生憂。行者觀生法空則滅喜心，觀滅法空則滅憂心。所以者何？生無所得，滅無所失，除世間貪憂故，是名無法有法空。

十八空中，初三品空，破一切法，後三空，亦破一切法。有法空破一切法生時、住時；無法空破一切法滅時；無法有法空，生、滅一時俱破。有言：過去、未來法空，是名無法空，現在及無爲法空，是名有法空。何以故？過去法滅失、變異歸無；未來法因緣未和合，未生、未有、未出、未起，以是故名無法。觀知現在法及無爲法現有，是名有法。是二俱空，故名爲無法、有法空。有言：無爲法無生、住、滅，是名無法；有爲法生、住、滅，是名有法。如是等空，名爲無法有法空。

是爲菩薩欲住內空乃至無法有法空，當學般若波羅蜜。

(完)